



Gobierno de
México

XTALAJKAXLAT xatalhman
pumapakgsinin niku
talajkaxtlawa, tamakgatsi chu
taxapa tipalhuwa xtalhkan
xlipulaktuy xapuxku limapakgsin
nima litapakgsiyaw xlikalanka
kimpulatamankan, xpalakatakan
xamakgan kachikinin chu
xalagtsitsakgan latamanin

Lengua indígena o agrupación lingüística y Autodenominación

Totonaco o Tutunakú

Variante lingüística y Autodenominación

**Totonaco central del sur o tutunáku /
tutunakú / totonaco**

XATALHMAN PUMAPAKGSIN TANIKU TALAJKAXTLAWA CHU TAMAKGANTAXTI
TASKUJUT
XPUMAKGATSOKGNI WANTI MAKGTAYA XAPUXKU MAPAKGSINA XLIKALANKA
PULATAMAN.

XTALAJKAXLAT xatalhman pumapakgsinin niku talajkaxtlawa, tamakgatsi chu taxapa tipalhuwa xtalhkan xlipulaktuy xapuxku limapakgsin nima litapakgsiyaw xlikalanka kimpulatamankan, xpalakatakan xamakgan kachikin chu xalagtsitsakgan latamanin

Anta kxilhpan kapsnat wilikanit wantu lilakgapskan xlikalanka kinkachikinkan taniku wan xtakuwani. Pumapakgsin tani wi xapuxku takamalh wanti mapakgsinan kxlikalanka kimpulatamankan.

ANDRÉS MANUEL LÓPEZ OBRADOR, xapuxku takamalh wanti mapakgsinan anta kxlikalanka kimpulatamankan, makatsinikgo xlatamanin uyma:

Wa xatalhman pumapakgsinin taniku talajkaxtlawa limapakgsin, kimakamnikgolh uma:

TALAJKAXLAT

“WA PUMAPAKGSININ TANIKU TALAJKAXTLAWA LIMAPAKGSIN ANTA XLIKALANKA KIMPULATAMANKAN, MAKGANTAXTIMAKGO XLITAYKAN WANTU TATAKGS A KXLI AKGTUMCIENTO A PUXUMAKUKITSIS TALHKAN NIMA WI ANTA KXAPUXKU LIMAPAKGSIN, CHU XPALAKATA LAKASKINGKOLH XALHUWA PUMAPAKGSININ TANI TALAJKAXTLAWAKGO LIMAPAKGSIN ANTA AKGATUNU XALANKA KACHIKININ CHU XAPUXKU KACHIKIN NIMA TATAKGS ANTA KXKITAT XLIKALANKA KIMPULATAMANKW|AN, WANKGOY PI TALAJKAXTLAWALH, TAMAKGATSILH CHU TAXAPALH TIPALHUWA XTALHKAN XLIPULAKTUY XAPUXKU LIMAPAKGSIN NIMA LITAPAKGSYAW XLIKALANKA KIMPULATAMANKAN, XPALAKATAKAN XAMAKGAN KACHIKININ CHU XALAKGTSITSAGAN LATAMANIN

Xakxstu talaklhkawlin. Talajkaxtlawma xli pulaktum, xlipulaktuy, xlipulaktati chu xlipulakitsis tatsokgni; nachuna xlipulaktum, xlipulaktuy, xlipulaktutu, xlipulaktati chu xlipulakkitsis, xlipulaktujun chu xlipulaktsayan xatapapitsit A; xlipulaktum chu xlipulaktuy tatsokgni, xlipulaktum, xlipulaktuy, xlipulaktutu, xlipulaktati, xlipulakkitsis, xlipulakchaxan, xlipulaktujun chu xlipulaktsayan tapapitsit, chu xlipulaktutu xatapapitsit B; chu xlipulaktum xatapapitsit C; tamakgatsilh xapulakchaxan tatsokgni; akgtum tatsokgni tani tataksa xapulaktuy tapapitsit, xlipulakitsis, xlipulakchaxan, xlipulaktujun tapapitsit, nima takaxtawilamakgolh lata takawililh, akgatum tatsokgni taniku tataksa xlipulaktsayan tapapitsit, chu xlikutuy chu xlikututu xatapapitsit A; akgtum talhkawlin anta xlipulaktum tapapitsit, chu xlipulaktuy, xlipulaktutu, xlipulakchaxan, xlipulajkaw chu xlipulakukitsis nima takaxtawilamakgolh lata takawililh anta kxatapitsit B; xlipulaktuy chu xlipulaktutu xatapapitsit C; chu akgtum xatapapitsit D; taxapay xlipulaktujun tapapitsit nima wi anta xliakgtuy tatsokgni chu xa awan tatsokgni xatapapitsit A, packs nima wilakgolh anta kxliakgtuy

talaklhkawilin kxapuxku limapakgsin nima litapakgsiyaw xlikalanka kimpulatamankan, xpalakata natamakxtakga lantla natamasiyu:

Xlipulaktuy talaklhkawilin. Wa xlikalanka kimpulatamatkan pakgtuminika chu nila katitamapitsilh, nima litachixkuwi xpulatamanin chu xtalismanin.

Anta xlikalanka kimpulatamankan tatakgskgo tipalhuwa talismanin chu takatsin, nima kgalhekgo latamanin wanti wi xkilhtsukutkan anta kxamakgan kachikinin, nima xlamakgolh akxni chinkgonit latamanin xala akilhtutu chu akgataxkumakgo la uku, wantiku lakgmaxtutilakgo, lajkaxtlawtilakgo chu masiytilkgo xatipalhuwa xtakatsikan.

Wanti litaya pi xamakgan xkilhtsukut chu pi tapkgasi klakatum xamakgan kachikin, wa natakilhti xpalakata tlan nakaknikan talakgtsokgwilin taniku talhakanit xlitaykan latamanin wanti kgalhekgo xamakgan xkilhtsukutkan.

Wa xalaksu kachikinin wanti tamapkgsekgo anta xamakgan kachikinin kgalhekgoy xtamakxtuminkan, xtalismaninkan chu xtalitamakgtaykan nima taliskuja anta xkatiyatnikan, nachuna kgalhekgo xmapakgsinaninkan lata wi xtalismaninkan.

Wa xlitaykan xamakgan kachikinin nikuma wan pi xakstu nalakapastakgo lantla namatlankikgo xpulatamankan chu lata namaskujukgoy xlimpakgsinkan, nakakni wantu tatsokgnit anta kxapuxku limapakgsin xpalakata makxtum natapakgsikgo kachikinin anta xlikalanka kimpulatamankan. Xpalakata natakakni xlatamatkan xamakgan kachikinin natakilhti limpakgsin nema tatsokgwilikgonit anta uma talaklhkawlin, nachuna xamakgan xtachuwinkan, niku wi xpulatamankan chu kum litaykgo xamakgan xkilhtsukutkan.

Talitaya pi xamakgan kachikinin tlan xakstukan namaskujukgo, nalitaykgo chu naliwankgo xlitaykan, nachuna takakni pi kgalhekgo xkatiyatnikan.

- A. Uma xapuxku limapakgsin litaya chu liwan xlitaykan xamakgan kachikinin pi tlan xakstu nalakapastakgo lantla namatlankikgo xpulatamankan chu lata namaskujukgoy xlimpakgsinkan, nachuna tlan xakstu kamapakgsikan xpalakata:
 - I. Nawankgo lata wi xlimapakgsinkan chu uma xapuxku limapakgsin lantla natamapakgsinan anta kxkachikinkan, lantla natalatamakgo, lantla natamakxtumikgo akxni nalaksakjkgo xmapakgsinaninkan chu akxni natlawakgo xtalismaninkan.
 - II. Namasjukgo chu nakaxtlawtilakgo xlimapakgsinkan wantu lilagxkutkgo xtakglhuwitkan, nima natatalakxtumi xtalhkawlin uma xapuxku limapakgsin, xlitaykan chu xlitakgalhmakgtaykan latamanin, nachuna nakakni xlatamatkan lakpuskatin. Anta klimapakgsin natalhkay akxni xlajkaxtlawnanin takglhuwin naukxilhkgo chu nawankgo pi tlan uma limapakgsinin.
Wa xlimakgatliwakga xlimapakgsinakan xamakgan kachikinin nima maskujukgo xmapakgsinaninkan xlikaknitkan limapakgsinin wantu wilakgolh la uku chu lata talhkanit kxapuxku limpakgsin.

- III. Tlan nalaksajkgo xmapakgsinaninkan chu xpalakachuwinaninkan lata wi stalismaninkan xpalakata xakstu nakamapakgsikan anta xkachikinkan, nachuna natakakni xlitaykan xamakgan lakpuskatin chu lakchixkuwin xpalakata tlan nalaksajkgo xmapakgsinaninkan chu tlan namagtanukgo akxni natakalaksaka mapakgsinanin; tlan na tapakgsekgo chu naliskujkgo wantu natakalilaksaka, uma tipalhuwa litay wantu talhkanit xankgalhi xlikaknit talajkaxlat wantu tatlawnit xlikalanka kimpulatamankan xpalakata makxtum nalayaw, nachuna nakakni xlimapakgsinkan laklanka kachikinin chu xla xapuxku kachikin nima tatakgsa anta xkitat kxlikalanka kimpulatamankan. Xlimapakgsinkan xamakgan kachikinin nikkxni katmatlanilh namalagachokgo xlitaykan latamanin akxni namagtanukgo chu natalaksaka mapakgsinanin, nachuna akxni natakatlawni takgalhskinin xla xkachikinkan.
- IV. Namagtakgalhkggo chu namatliwakglhkggo taniku tatakgsa xkakiwinkan, xtalismaninkan chu packs wantu anankgo xkachikininkan. Natakakni wantu lakapastajtlawkggo anta xpulatamankan lata wan tipalhuwa limapakgsinin.
- V. Natalichuwinan, nataliskuja, natamakgtakgalha, natalekgalhtawakga chu natalimakatsininan xamakgan tachuwinn xpalakta natakatsi pi wa talilakgapisa xlikalanka kimpulatamankan, nachuna nataliskuja xpalakata tlan natalichuwinan taniku wilakgolh xalimakatum chiki chu taniku ka natasakwa.
- VI. Namagtanukgo lata wan xlipukaktutu talhkawlin xla xapuxku limapakgsin, akxni natatlawa pulaklhuwa tatsokgni taniku natalhkay lantla natamakglhtawkgenan xpalakata natakni xtalismaninkan, xtachuwinankan chu lata makgalhtawkgenankgoy xamakgan kachikininan.
- VII. Nataliskuja, natalakgmaxtu, natamatliwakglha chu natalichuwinan xamakgan xtamakuchinkan, nachuna xamakgan taskujut nima talakaskin akxni tamagtaya lakpuskatin wanti kgalhimakgolh xlimagtakgalhatkan, akxni lakachinkgo chu lata takauxilha lakgskgatan akxni skgatankgonita.
- VIII. Namagtakgalhkggo chu namatliwakglhkggo xkatiyatnikan xpalakata liwna natawila wantu tatakgsa chu lata tipalhuwa wantu anan xkakiwinkan, nachuna namagtakgalhkggo taniku kaknikgo xpuchinakan, nikuma lakgapaskgo mapakgsinanin.
- IX. Tlan namagglhtinkgo kakiwinin lata talhkanit anta kxapuxku limapakgsin chu amagapitsi limapakgsinin nima kakilhtikan akxni tamasta katiyatna, chu litay wantu makgamagglhtinkgonit latamanin wanti wilakgolh xkachikinkan, tlan nalakaskingo kakiwin nima tatakgskggo xkachikinkan chu tlan nalakaskinkgo wantu masta chu wantu anan jkakiwin, chu nima nila katlakaskingolh wa namapakgsi xatalhman pumapakgsin lakum tatsognit anta uma xapuxku

limapakgsin. Akxni na liwamaputunkgo uma litay tlan na tastokgoy lata talhagonit klimapakgsinin.

- X. Anta kachikinin taniku lamakgolh latamanin wanti kgalhekgo xamakgan xkilhtsukutkan nalaksajkgo xpalakachuwinaninkan wanti naskujkgo anta kpumapakgsin, wa uma talaksakni na kakni limapakgsin nima wan pi kitat namakgtanukgo lata lakpuskatin chu lakchixkuwin, nachuna tlan namakgtanukgo latamanin wanti kgalhikgo atanu xamakgan xtalismaninkan. Wa xapuxku limapakgsin chu xlimapakgsinkan xalanka kachikinin nakaknikgo uma litay chu nawankgo lantla naliskujkan xpalakata tlan namakgtanukgo latamanin wanti kgalhekgo xamakgan xkilhtsukutkan akxni natawila pulaksakni chu akxni nakatlawnikan takgalhskinkan xla xkachikinkan.

Taxapalh tatsokgni

- XI. Liwna nakamakgtaykan anta kpumapakgsinin taniku talakaxtlawa takglhuwit. Akxni naliwankgo xlitaykan kpumapakgsinin xalichatum chu xalimkatum natakakni xamakgan xlimapakgsinkan nima maskujukgo xkachikinkan chu xtakatsinkan lakum talhkanit anta xapuxku limapakgsin.

Wa latamanin wanti kgalhekgo xamakgan xkilhtsukutkan kgalhikgo xlitaykan xpalakata xankgalhi nakamakgtaya palakachuwinanin, akgspuchuwinanin chu wanti tlan tsokgnankgo chu chuwinkgo xamakgan xtachuwinkan, nachuna nakamakgatya wanti likgalhtawkgakgonit chu liskujmakgolh xlitaykan xamakgan kachikinin, xamakgan xlimapakgsinkan, limapakgsin xpalakata lakxtum nalakaknikgo lakpuskatin chu lakchixkwin, xtakatsinkan chu xtachuwinkan xamakgan kachikinin.

- XII. Tlan namakatlankikgo xkachikinkan lata wi xtalismaninkan, xtaskujutkan/xtalimakgataykan chu xtamakxtumitkan, nachuna xankgaalhi nakaknikgo xkakwinkan chu packs wantu tatakgsa, lata talhkanit xklimapakgsin.

- XIII. Nakakgalhskinkan akxni namakilhtsukikgo limapakgsin, xpalakata nawankgo kum namakglakgalhi xlatamankan chu xkachikinkan, chu alistalna tlan na mastakgo xtalakaskinkan chu natakatachuwinankan xpalakata nauxilhkggo tuku xtalilakgpalit anta klimapakgsin.

Akxni nakatlawnikan takgalhskinin latamanin wanti kgalhekgo xamakgan xkilhtsukutkan natakakni limapakgsinin taniku talhkanit xlitaykan xamakgan kachikinin nima tatakgsa anta uma xapuxku limapakgsin.

Kum limapakgsin wantu tamakilhtsukiptun tlakg maxki litay a chatum lataman wa uma na xokgo wantu natalakaskin akxni natatlawa takgalhskinin.

Akxni chatum lataman o akgtum tamakxtumit nalitapaxkikgo limapakgsin nima nalitatlawa takgalhskin, xlitaukxilhat xpalakata xamakgan kachikinin liwna chu lakxtum nalakgchankgo xatatlaja, lata talhkanit amakgapitsi limapakgsinin.

Xmanwa xamakgan kachikinin chu laksu pulatamin takamaxki litay xpalakata naliwankgo anta kpumapakgsin taniku talakgxkuta taakglhuwit akxni ni natakakni xlitaykan nima talhkawlini anta uma tamapitsit. Anta klimapakgsin taniku talhkanit uma litay na tatakgsa lantla natatlawat akxni nataliwan uma litay.

Taxapalh tatsokgni

B. Xlikalanka kimpulatamankan, xalalanka kachikinin, kachikinin chu lata tamapkgtay xkatiyatni xapuxku kachikin nima tatakgsa anta kxkitat xlikalanka kimpulatamankan, namatsukigo xputamakgtay chu naliskujkan xlitaykan xamakgan kachikinin, nachuna naliskujkgo xpalakata tlan xakstu namatlankikgo xkachikinkan lata wi xtalismaninkan chu lata kaknikgo xkakiwinkan, nikuma nanamakglakapastakggo chu naliskujkgo.

Wa mapakgsinanin xlitlawatkan uyma:

I. Namakgtaynankgo akxni natakamatlanki laktsu kachikinin chu taniku lamakgolh amakgapitsi xamakgan kachikinin, xpalakata tlan nalatamakgo chu natawilkgo, lata talhkanit anta nikuwan lakuntla natakamakgataya kachikinin wantu namatliwakglhkggo xtaskujutkan, xaluwan xtachanankan, xamakgan xtachanan, lantla tachan xawat, xamakgan talhtsi chu liwat nima tamakgala kakiwin chu nima alistalna talajkaxtlawa, nachuna lantla aktanks natalakaskin katiyatni, taniku nikatitalakaskilh likuchun nima lakgalhi katiyatni chu tipalhuwa likuchun nima talakaskin tani makgolh tachanan.

Wa limapakgsin na wan lantla natamakgxtumekgo chu nalajkaxtlawakgo xtaskujutkan anta akgatunu xamakgan kachikinin, nachuna nakaknikgokan xamakgan taskujut nima kalilakgapaskgokan.

II. Natawan anta klimapakgsin xpalakata lakxtum, liwna chu xa akchan nakamaxkikan tamakgtay xamakgan kachikinin, nima xakstukan namaskujukgoy.

III. Natamatsuki tipalhuwa taskujut xpalakata natakakni chu natamakgtakgalha packs wantu anan anta xkatiyatnikan, wantu lakapastaktlawkgo akxni limasiykggo kxkachikinkan, xtakatsinkan chu xtalismaninkan xamakgan kachikinin, lata talhkanit klimapakgsin.

IV. Natamakgantaxti chu natamatliwakglha takgalhtawakga nima tamasiyu anta kxamakgan kachikinin, taniku tatakgsa xatipalhuwa xtalismaninkan chu xtachuwinkan, wanima:

- a) Natamakgalhtawkgenan xlipulakatunu lantla wi pukgalhtawa, wa nima nikataxokgolh, taniku natamasiyu xa tipalhuwa takatsin chu xatipalhuwa tachuwini;
 - b) Natamakgalhtawkgekgo latamanin wanti kgalhekgo xamakgan xkilhtsukutkan chu nataliskuja xpalakata natamasiyu xamakgan xtakatsinkan anta xpulatamankan;
 - c) Natakamaxki tamakgtay latamanin wanti kgalhekgo xamakgan xkilhtsukutkan wanti kgalhtawkgmakgolh xlipulakatunu pukglhtawakga;
 - d) Nataliskuja xpalakata natamakgalhtawkgenan kxatipalhuwa kxamakgan tachuwini, lata tamasiyu anta kxkachikinkan, chu
 - e) Natatlawa taskujut xpalakata natalhkawli lantla natamasiyu takgalhtawakga, nima nalimatlankikan xtalismaninkan chu tu namakgamakglhtinankgo xamakgan kachikinin, xpalakata xlakaskinka anta xlilakatum kakinkachinkan. Nachuna nataliskuja xpalakata limakxtum natakakni kintalismaninkan chu natalakgmakgan tapuwan wanima nilakxtum talalikxilhaw.
- V. Liwna natamasta tamakuchin chu nataliskuja xpalakata natakani xlitaykan latamanin wanti kgalhekgo xamakgan xkilhtsukutkan ti ankgoy kpumakuchin, nachuna natakakni lantla makuchinankgo anta kxpulatamankan.
- VI. Natamakgantaxti xlitaykan xpalakata liwna chu xakchan nawayankgo lata lismanikgonit chu pulhna nataukxilhkgo lakgskgatan xpalakata namakglhtinkgo uma litay.
- VII. Namatlankekgokan xlatamatkan xamakgan kachikinin chu tani tamakxtumikgo chu tlawakgo xtalismaninkan, nima nataliskuja xpalakta tlan namkgalhtinkgo tamakgtay nima nalikaxtlawakgo xchikan chu xpulakni xchikan, nachuna amakgapitsi tamakgtay, xpalakata liwna natalatamakgo kxkatiyatnikan, xtakatsinkan chu xmakgan xlisukujnikan wantu lakaskinkgo anta xkachikinkan.
- VIII. Lakxtum natamakgantaxti xlitaykan lakpuskatini wanti kgalhekgo xamakgan xkilhtsukutkan akxni natakamatlanki xpulatamankan, nakgalhtawakgakgo, namakglhtinankgo katiyatni, namakgtanukgo akxni natatlawa takgalhskinin anta xpulatamankan nachuna akxni natalichuwinan chu natakakni xlitaykan.
- IX. Natamakgantaxti chu natamatlanki wantu talakaskin akxni makgat anaw chu chu makgay kilhanaw, xpalakata anta kxamakgan kachikinin natatlawa chu natamatitlanki xamakgan xtakaxtlaw xtijikan, nachuna taniku takgaxmata tamakatsinin, taniku tamatitaxtu tamakatsinin chu taniku tatakgsa tipalhuwa takatsin.
- X. Natawli chu natamakgantaxni xpalakata xamakgan kachikinin tlan namakglhtinankgo, namaskujukgo, nalichuwinanankgo, namatlankikgo chu namaskujukgo taniku matitaxtikgo xtamakatsininkan, nachuna xakstu naliskujukgo taniku tamatitaxtu xtamakatsininkan chu amakgapitsi xasasti

liskujni wantu taxutilakgo, nataliskuja xpalakata tlan namasta xlimakgatliwakga wantu talakaskin akxni takgaxmata chu tauxkilha tamakatsinin, nachuna wantu talakaskin akxni tamakan tamakatsinin, taniku xlitalakaskinat xamagan xtachuwinkan chu amakgapitsi talismaninkan.

- XI. Nataliskuja xpalakata xamagan kachikinin nakakaknikan xkilhsukutkan chu xtakatsinkan akxni namakgtanukgo taniku kamatitaxtikan tamakatsinin.
- XII. Natamakgtaya xtaskujutkan xamagan kachikinin wanima litlajakgo tumin chu nima nimakglekgalhi katiyatni, xpalakata wanti kgalhekgo uma taskujut xakchan nakgalhikgo xtatlajakan, namastakgo taskujut, natamakgnukgo xasasti chu xamagan takatsin, xpalakata tlakgnatlawkgo taskujukan, nachuna xplakata liwna natamalakgatumi wantu tamakgala chu wantu tatlaw.
- XIII. Natalhkay lata natatlawa taskujut xpalakata natamakgtakgalhikgo xamagan kachikinin chu latamanin wanti kgalhekgo xamagan xkilhsukutkan nima makgat minkgoyach, xpalakata sasti makilhsukikgo xlatamatkan anta xlikalanka kimpulatamankan chu alkatanu pulataman, wa nima natakalmakgtaya:
 - a) Natakakni lata tamakxtumikgo xamagan kachikin wanti ankgoy tawilakgo alkatanu pulataman chu latamanin wanti kgalhekgo xamagan xkilhsukutkan ti makgat minkgoyacha xpalakata sasti makilhsukikgo xlatamatkan chu natakakni lantla kgalhikgo xtalkapastaknikan chu xtakatsinkan anta xlikalanka kimpulatamankan;
 - b) Natamakgantaxti xlitaykan wanti maskujukgoy katiyatni, wanti makgskujkgo kchiki chu latamanin wanti ni aktanks katsikgo chu nkgatsikgo xmaknikan;
 - c) Nataliskuja xpalakta liwna namakglhtinkgo tamakuchin lakpuskatin, nachuna natakamakgtaya laktsulaktsuman, laktsulajkgawsan chu kamanin wanti makgat minkgoyacha xpalakata sasti makilhsukikgo xlatamatkan;
 - d) Xankgalhi natamakgtakgalha xlitaykan, chu
 - e) Natakakni akxni natamasiyu chu natalichuwinan xtalismaninkan chu akxni xalimakxtum nataliskuja xpalakata natamatliwakglha akgatunu chiki chu xlilakgatum xkachikinkan.

Klimapakgsin natalhkay lantla tlan natapakgsikgo anta kxlikalanka kimpulatamankan latamanin wanti kgalhekgo xamagan xkilhsukutkan ti ankgoy tawilakgo alkatanu pulataman chu wanti makgat minkgoyacha xpalakata sasti makilhsukikgo xlatamatkan, nachuna lantla tlan nakikilhtikgoy xtakatsinkan chu xtalismaninkan.

- XIV. Natakagalhskinkgoy xamagan kachikinin akxni natamatsuki tatsokgni wantu tlawakgo xatalhman mapakgsinanin taniku talhkay lantla natakamakgtaya latamanin chu lantla natakatlanki kachikinin, nachuna akxni natatlawa uma tatsokgni anta xalanka kachikinin, kachikinin chu kachikin

nima tatakgsa kxkitat xlikalanka kimpulatamankan, taniku natakakgaxmatni chu natalhkay wantu nawankgoy chu naskinkgoy.

XV. Natatlawa takgalhskinin chu natakataskuja latamanin wanti palakachuwinankgo xamagan xkachikinkan, akxni natatlawputun chu natamskujuputum limapakgsin nima tlawkgoy xpalakachuwinanin kachikin chu mapakgsinanin wanti lakgayakgolh taniku takamakgtayakgo latamanin, xpalakata uma limapakgsinin ni namaklekgalhikgo xlatamatkan chu xpulatamankan, lata talhkanit tapapitsit XIII, xla xalanka tapapitsit A, nima tatakgsa anta uyma ktalhkawlin.

Wa xatalhman pumapakgsin taniku talajkaxtlawa limapakgsin kxlikalanka kimpulatamankan, xpumapakgsinkan wanti lajkaxtlawkgoy limapakgsin anta akgatunu xalanka kachikinin chu wanti lakgayakgolh kachikinin, lata kamaxki litay limapakgsin, xliwanatkan lantla natakamaxki tamakgtay xamagan kachikinin chu lantla namaskujukgo, lata talhkanit klimapakgsinin.

Ni katamaklekgalhilh xlitaykan latamanin wanti kgalhekgo xamagan xkilhtsukutkan chu xamagan kachikinin nima talkhkanit anta uyma klimapakgsin, nachuna natakakni xlitaykan kachikinin chu latamanin wanti nalitaykgo pixamakgan xkilhtsukutkan lata wan klimapakgsin.

C. Wa uma xapuxku limapakgsin maxki xtakaknikan kachikinin chu laktsu kachikin taniku wilakgolh xalagtsitsakgan latamanin, lantla lilakgapskgokan, wanima litapakgsikgo lata tipalhuwa xamagan kachikinin anta xlikalanka kimpulatamankan. Nakgalhikgo xlitaykan nima talhkanit anta kxalanka tapapitsit nima kgalhi uma talaklhkawilin, xpalakata tlan namakatlankikgo xkachikinkan chu natakaknikgo xliputumkan, lata wan xapuxku limapakgsin, nachuna tlan natlawkgoy xtapuwankan chu xtalaksaknikan lata masta talakaskin uma limapakgsin xpalakata makxtum nalakgo kxlikalanka kachikin.

Wa kachikinin chu laktsu kachikinin tani lamakgolh xalagtsitsakga latamanin kgalhikgo xkilhtsukutkan anta kpulatamanin nima wilakgocha anta xakilhtutu, nima kaliminkanit akxni chinkgonit luwanan anta xlikalanka kimpulatamankan, chu wanti limkgonit xtamakxtuminkan, xtaskujutkan, xtalajkaxlakan chu xtakatsinkan nachuna matliwakglhikgo xtakatsinkan tani wilakgolh.

Wa kachikinin chu laktusku kachikin taniku lamakgolh xalagtsitsakga lamatanin takamaxkilh takakni xpalakata tlan chu xakstu namaskujukgo xlitaykan nachuna packs wantu kgalhikgo xpulatamankan. Na kgalhikgo amakgapsi litay:

- I. Natamakgtakgalha xlitalakgapasnikan, xtalismaninkan, xtakanalakan, chu packs wantu kgalhikgo anta akgatunu kxkachikinkan, wantu lakapastaklawkgoy akxni limasiykgoy kxkachikinkan, lata wi limapakgsin
- II. Natalichuwinan, natamaxki takakni chu natamkgtakglha xtakatsinkan chu wantu limakgtaynakgo xpalakata natawla xatalhkan xtalilakapastakni

kimpulatamankan, chu lata wi xatipalhuwa xtakatsinkan kachikinina anta xlikalanka kimpulatamankan, nima natawila kxalimapkgsin pulakatunu pukgalhtawakga taniku na wan lantla natamasiyu xatakgalhtawakga takatsin, chu

- III. Natalhkanukgo taniku talhkay talilakgapsni, tamakatsin, taputlakga chu xatakgalhskin lata wi latamat, xpalakata wanti lakgayakgolh tima taskujut nawankgo lata natlawa akxni namatsokgninankgoy xlitalakgapsnikan chu xlitapakwitkan.

D. Wa uma xapuxku limapakgsin maxki takakni chu wanti lakgayakgolh xlikalanka kimpulatamankan namakgantaxtikgo xlitaykan lakpuskatin wanti kgalhekgo xamakgan xkilhtsukutkan chu xalaksitsakga lakpuskatin xpalakta tlan namakgtanukgo akxni natakamatlanki xkachikinkan chu laktsu xkachikininkan, akxni natatlawa takgalhskinin xalimakxtum; natakni xlitaykan xpalakata tlan nakgalhtawakgago, nakuchunkgo, namakglhtinankgo katiyatni, nakgalhekgo xkatiyatnikan chu amakgapitsi litay.

Natamaxki takakni chu natamakgantaxti xlitaykan lakgskgatan, kamanin chu xalalanka kaman nachuna xalagtsitsakgan laktsukaman, kamanin chu xalalanka kaman, xpalakata liwna namakgtaykgokan, lantla xachiwinakgoy, xpalakata nakgataksgko xlitaykan, tlan nakgalhtawkgakgo, nakuchunkgo, nalakaskinkgo liskujni taniku taputsa takatsin, wantu limakaskujkgo, takgaman chu natakamasiyini taskujut, chu amakgapitsi. Nachuna nataliskuja xpalakata nikatamastalh talaksin akxni nitu nataliukxilha latamanin chu akxni natamakglekgalhiputunkgo laktsuman, nachuna nataliskuja xpalakata natamalagachokgo talismanin wantu makglekgalhikgo xmaknikan chu xtalakapastanikan kamanin, chu uma taskujut xankgalhi nakakni xlitalkapsnikan.

Xlikalanka kimpulatamankan, xalalanka kachikinina chu kachikinina naskujkgo xpalakata natakakni xlitaykan nima talhkakgonit anta uyma xapuxku limapakgsin, xpalakata natalakgmakgan tapuwan wanima nilakxtum talalixilhaw chu akxni tanunk xkilhtsukutkan amakgapitsi latamanin chu akxni nitasiyakgoy laktsu kachikinina chu kachikinina niwilagko xalagtsitsekkan latamanin.

Anta klimapakgsin natalhkay xalistaktayat chu lantla nataliskuja xpalakata natakakni chu natamakgantaxti xlitaykan kachikinina chu xamakan kachikinina chu xalatsitsekkan latamanin, nima talhkakgonit anta uyma xapuxku limapakgsin.

Xapuxku xlimapakgsinkan chu amakgapitsi xlimapakgsinkan xalalanka kachikinina, wankgoy lantla nataliskuja chu namakgantaxtikgoy wantu thalkanit talaklhawlin, chu wantu lakgchankgo.

Xtatakatsin talhkawilin

Xlipulaktum. Wa uma limapakgsin natsuku skuja lichali lata natamasiya anta taniku tamawakay limapkgsin xlikalanka kimpulatamankan.

Xlipulaktuy. Akxni lata natsuku skuja uyma limapakgsin, nataxapa amkgapitsi nima talatlawakgo wantu talhkanit anta uyma limapakgsin.

Xlipulaktutu. Xatlanka pumapakgsin taniku talajkaxtlawa limapakgsin, kgalhi kitsispuxum a tatipuxum kilhtamaku lata natanuyacha uma talajkaxtlat, xpalakata natamaxtu xasasti limapakgsin, chu alistalna natatamalaxtumi amakgapitsi nima wilakgolha.

Xlipulaktati. Xatalhman pumapakgsin taniku talajkaxtlawa chu tamakgantaxti taskujut xilakgpalit limapakgsin xpalakata natakakni chu natamakgantaxti xlitaykan kachikinin, xamagan kachikinin chu lakgtsitsakga latamanin anta nitamaxki takakni uyma klimapakgsin; chu kgalhi kitsispuxum a tatipuxum kilhtamaku lata natanuyacha uma limapakgsin.

Xlipulakkitsis. Wa mapakgsinanin wanti wilakgolh xlipukakatunu pumapakgsin, lata kgalhekgo xtaskujutkan, xilakaxtlawatkan limapakgsin wa nima namakgtaklha xlitaykan kachikinin, xamagan kachikinin chu xalagtsitsakga latamanin xpalakta xakstu nalakapastakgo lantla namatlankikgo xpulatamankan chu lata namaskujukgo xlimpakgsinkan, lakum wan uma xapuxku limapakgsin, nachuna tlan namaskujukgo xlitayakan chu xakstukan nalitaykgo chu naliwankgo, nikuma xankgalhi nakaknikgokan, chu kgalhikgo kitsispuxum a tatipuxum kilhtamaku lata natanuyacha uma limapakgsin.

Xlipulakchaxan. Wantu nalitamakgatsankangan akxni natlawkan uma limapakgsin wa natalixokgo tumin wantu na wan pumapakgsin taniku talajkaxtlawa limapakgsin, chu wanima kgalhikgo chu maskujukgo xtuminkan; akxni natalakgpali lata wilakgolh wanti maskujukgo tumin nalajkaxtlawakgoy xpalakata ni atanunk naskinkgo akgatunu kata.

Xlipulaktujun. Xatalhman pumapakgsin taniku talajkaxtlawa chu tamakgantaxti taskujut nalitakgatsangka xpalakta uma limapakgsin natatsokga tipalhuwa kxamagan tachuwini lata wilakgolh kachikinin chu namapakgsinan xpalakata natalichuwinan chu natamasiyu.

Xlipulaktsayan. Akxni natakamasiyni wantu tatsokgnit anta uyma limapakgsin, nakilakatkan xapuxku limapakgsin chu xalalanka talajkaxtlan anta niku makgtanuma xlikalanka kimpulatamankan, nachuna amakgapitsi talhkan wantu limin anta uyma talajkaxlan.

Kachikin nima tatakgsa anta kxkitat xlikalanka kimpulatamankan, xli puxumkunajatsa kilhtamaku xliakgnajatsa papa lata tlawma uyma kata.- Xatalhman xljakatlawna limapkgsin. Gerardo Fernández Noroña, Xapuxku.- Xljakatlawna limapkgsin, Ifigenia Martha Martínez y Hernández, Xapuxku.- Xatalhman xljakatlawna limapkgsin. Verónica

Noemí Camino Farjat, Makgatsokgna.- Xlajkatlawna limapkgsin, Nayeli Arlen Fernández Cruz, Makgatsokgna.- Tamakata.”

Xtamkgantaxtit lata wan tapapitsit I, xla xatalaklhkawilin 89, xla xapuxku limapakgsin xlikalanka kimpulatamankan, xpalakata liwna natalichuwinan, natamasiyu chu nataliukxilha, kmaxtu uyma talajkaxlat taniku wi xapuxku pumapakgsin, anta kachikin nima tatakgsa anta kxkitat xlikalanka kimpulatamankan, tipuxumkaw xliakgnajatsa papa lata tlawma uyma kata.- Andrés Manuel López Obrador. Tamakata. Xmakgatsokgna xapuxku mapaksina, Luisa María Alcalde Luján.- Tamakata.